

EH BILDU

Ijentea, 1 - Tel. 943481027 - www.donostia.ehbildu.eus -
20003 Donostia

KONTROL MOZIOA

Gabonetako argiei buruzkoa

EH Bildu udal taldeko zinegotzi Garbiñe Alkiza López de Samaniegok, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2022ko irailaren 19an Lurralde Garapen eta Planifikazio Batzordean aurkeztutako interpelazioaren ondorioa da.

JUSTIFIKAZIOA

Gaur egun eragile eta administrazio guztien agendan dago klima-aldaketaren aurkako borroka (larrialdi klimatikoa, dagoeneko). Argi dago larrialdi klimatikoa gure ongizatearentzako mehatxu nagusietakoa dela eta benetako zibilizazio erronka bilakatu dela.

Iraunkortasunik gabeko sistema batean bizi gara, eta iraunkortasun hori lortzeko planifikazioa egin behar dugu, gure sistema sozial eta ekonomiko osoan. Auzi horrek energiaren gaian arreta jartzera garamatza.

Abuztuaren 1ean Espainiako Gobernuak dekretu berri bat kaleratu zuen, eta bertan hainbat neurri ezarri dira 2023ko azarora arte iraungo dutenak gutxienez. Adibidez, eraikin publikoetan, saltoki handi eta txikietan, jendeari irekita dauden bulegoetan, taberna eta ostatuetan, kulturguneetan eta garraio publikoko eraikinetan berogailuek ezingo dute 19 graduko muga gainditu, eta aire egokituak, 27 gradukoa; gainera, eraikin horien kalerako sarrera-irteera guztiak itxita egon beharko dira, berogailua edo aire egokitua jarrita dagoenean. Eta jarduera amaitzean, eraikineko argi guztiak itzali beharko dira. Dekretuak eraikinen kanpoko argiztapenari buruzko neurriak ere jasotzen ditu. Esaterako, dendetako

EH BILDU

Ijentea, 1 - Tel. 943481027 - www.donostia.ehbildu.eus -
20003 Donostia

erakusleihatuko argiek 22:00etatik aurrera itzalita egon beharko dute. Baita eraikinen eta monumentuen argiztapena ere, jarduera amaitzen dutenean. Honen guztiaren helburua energia kontsumoa murriztea da.

Espainiako Gobernuak hartutako neurriak ez dira aski, ordea, eta Donostiako Udalak ere bestelako neurriak hartu behar ditu benetan larrialdi klimatikoari eta bizi dugun energia krisiari aurre egin nahi badio. Trantsizioa egin behar da sistema iraunkor batera, baina kontua ez da ordezkapenak egitera mugatzen: kontsumo joeretan eraginkortasuna bilatu behar dugu eta joerak aldatu.

Hainbat neurri ezarri eta herritarrek beren gain hartzen dituzten bitartean, aurten Donostia 2022ko Gabonetako Europako hiriburua izendatu dute, eta horregatik, gabon bereziak izango zirela adierazi zuen Udal Gobernuak: argiztapena indartuko zela Urumearen inguruan eta argi-proiektu bat sustatzeko enklabe natural baten bila zebilela.

laz, Donostiako Udalak 410.000 euro gastatu zituen argietan, aurreko urtean baino % 4 gehiago. Aurtengo aurrekontuari buruz galdetuta, Udal Gobernuak adierazi du aurrekontu bera erabiliko duela gabonetako argietarako.

Aurrekontu hori gaur egun hartu behar ditugun neurriekin bateraezina dela uste dugu. Hortaz, mundu mailako larrialdi batean egonik, herritarrek, enpresariak eta administrazioek bestelako neurriak hartzen dituzten garai honetan, ezingo genuke ulertu Udal Gobernuak gabonetako argiekin bestelako neurri zuzentzailerik ez hartzea.

Donostiak 2020ko martxoan larrialdi klimatikoaren egoera deklaratu zuen. Adierazpen horretan “egungoak baino asmo handiagoko” konpromisoak hartu behar direla adierazten da,

EH BILDU

Ijentea, 1 - Tel. 943481027 - www.donostia.ehbildu.eus -
20003 Donostia

“berotegi-efektua eragiten duten gasak murrizteko” eta “karbono-emisio garbiak ahalik eta azkarren zerora murrizteko, lehenbailehen eta lehentasunez”. Eta horrela bukatzen du adierazpenak: “Larrialdi-egoera batek gure Udalaren eta gure hiriaren baliabide erabilgarriak birbideratzea eskatzen du, klima-krisiari aurre egiteko, horrek dakartzan arazoekin”.

Donostiako Udalak eredugarri izan behar du gai honetan. Areago, herritarrei eta enpresariei esfortzua eskatzen ari zaienean, eta instituzio guztietatik udazken eta negu “gogorrak” datozela ohartarazten ari denean.

Testuinguru honetan, Udal Gobernuak proposatutako neurriak (ohi baino geroxeago piztea eta ordutegia murriztea) ez dira nahikoa.

Horiek horrela, honako hau da behean sinatzen duen zinegotziak aurkeztutako KONTROL MOZIOA:

- Donostiako Udalbatzak hertsiki eskatzen dio Udal Gobernuari, larrialdi klimatikoari aurre egin eta energia krisiari erantzuteko bidean ekarpena egiteko eta eredugarri izateko, gabonetako argiekin aurreikusia duen aurrekontua eta erabilera erdira jaitsi dezala.

Donostian, 2022ko urriaren 20an

Garbiñe Alkiza López de Samaniego
EH Bildu udal taldeko zinegotzia